

Paasissutissanik qarasaasiatigut suliarinnittarfinnik angisuunik Kalaallit Nunaannut inissiinissaq nunani tamalaani ingerlatseqatigiiffinnut pilerinartunngortinniarlugu naalakkersuinikkut suliniutinik sunik aallartitsisoqarsinnaanera pillugu Naalakkersuisut nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaat 1. januar 2027-utinnagu Inatsisartuni agguanneqassaaq.

(Inatsisartunut ilaasortaq Jørgen Rosbach, Demokraatit)

Akissuteqaat

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Aappassaaneerpeqarnera

Naalakkersuisut sinnerlugit Sanaartornermut ataatsimiititaliap siunnersuummik suliaqarsimaneranut ataatsimiititaliallu isumaliutissiissutaanut qujavunga.

Naalakkersuisuni maluginiarparput ataatsimiisitaliamit kissaatigineqartoq Tasersiami Tarsartuullu taseruani erngup nukinganik angisuunik nukissiorfiliorsinnaaneq pillugu suliariumannittussarsiornermi misilittakkat ataatsimut katersorlugit nassuiaasiortoqarnissaa. Ataatsimiisitaliamit ilaatigut kissaatigineqarput iluanaarutinit isertitanillu akileraarutit sammineqarnissaat. Tusaatissatut tiguneqarpoq Ataatsimiisitaliap kissaatigimmagu nunani allamiut aningaasaliissutaannik piginnittuusarnerinullu sinaakktissat misissorneqarnissaat. Tassunga atatillugu Naalakkersuisut maluginiaqquvaat imaatigut kabelinik pilersuinermut tunngasut Tusass A/S suleqatigalugu pisarmata.

2026-mut aningaasanut inatsisip isumaqatigiissutaanerata akuersissutigineranut atatillugu Naalakkersuisunit aalajangiiffigineqareerpoq paasissutissanik qarasaasiatigut suliarinnittarfinnik angisuunik pilersitsinissaq nunani tamalaani ingerlatseqatigiiffinnut pilerinartunngortinniarlugu periarfissat ilungersunartullu pillugit misissuisoqarnissaa. Taamatut suliaqarneq siunnersuummut tulluurtuuvoq oqallinnerullu nangeqqinnissaani patajaatsumik aalajangiiniarluni tunngavissiornissamut tapertaassussaalluni.

Suliniutaasussat pisariaqartut suunerinik takutitsilluni ataatsimut misissuinerup takutittussaavai paasissutissanik qarasaasiatigut suliarinnittarfiit angisuut pillugit Kalaallit Nunaata nunani tamalaani ingerlatseqatigiiffinnut pilerinartunngortitsiniarnerani suut pisariaqartuunersut ilutigisaanillu nuna tamakkerlugu suut isumagineqarsinnaanersut.

Taamatut oqaaseqarlunga inassutigissavara Ataatsimiisitaliamit siunnersuutip inaarutaasumik akuersissutigineqarnissaa..